



Los ntawm Thawj Tswj
Hwm Henry B. Eyring

Tus Pab Cuam thib Ib hauv
Thawj Pawg Thawj Tswj Hwm

Lus Qhia txog tej uas Yuav Muaj Los Yav Tom Ntej thiab Kev Tshwm Sim rau Yus tus Kheej

Tus Tswv tau muab Yexus Khetos lub Koom Txoos tseeb txum tim rov qab los rau hauv lub ntiaj teb hnuv no. Yexus Khetos lub Koom Txoos ntawm Tsoom Haiv Neeg Ntseeg hauv Hnuv Nyoog Kawg yeej muaj cov yaj saub thiab cov thwj tim coj, uas txais tej lus qhia los ntawm lub ntuj ceeb tsheej los tsis tu tsis tseg.

Twb muaj li no thaum ub thiab. Peb kawm los ntawm phau vaj lug kub Npaiv Npaum. “Tus Tswv yuav ua ib yam dab tsi, nws yeej xub qhia rau nws cov tub txib uas yog cov [yaj saub] paub ua ntej nws mam ua” (Amaus 3:7).

Vajtswv twb rov qab hais lus hauv peb lub caij nyoog, dhau los ntawm tus Yaj Saub Yauxej Xamiv. Nws muab Yexus Khetos txoj moo zoo tag nrho tshwm sim dhau los ntawm tus Yaj Saub Yauxej Xamiv. Nws muab Nws lub pov thawj hwj dawb huv nrog rau cov yuam sij thiab cov cai, hwj chim, thiab hom phiaj tag nrho ntawm lub hwj chim pov thawj hwj dawb huv.

Niaj hnuv nim no, Vajtswv Leej Txiv thiab tus Tswv Yexus Khetos tso cai rau cov yaj saub thiab cov thwj tim uas muaj txoj sia nyob kom hais lus, qhia, thiab coj. Tus Cawm Seej hais rau tus Yaj Saub hais tias tus Tswv tau hais dab tsi lawm ces, Nws yeej tau hais lawm thiab Nws tsis thim Nws tus kheej; thiab txawm yog lub ntuj thiab lub ntiaj teb no dua mus lawm los, Nws txoj lus yeej yuav tsis dua mus, tiam sis tag nrho yeej yuav muaj raws li tau hais, txawm yog los kiag ntawm Nws lub suab los sis los ntawm Nws cov tub qhe lub suab, yeej yog ib lub” (Q&K 1:38).

Nyob hauv lub tuam rooj sab laj ob zaug ib xyoo, peb tau koob hmoov vim peb muaj cib fim mloog tus Tswv tej lus los ntawm Nws cov tub qhe. Qhov no yog ib txoj koob hmoov uas muaj nqi heev. Tiam sis qhov no tsuas yuav muaj nqi nyob ntawm seb peb puas txais tej lus ntawd raws li tus Ntsuj Plig qhia uas yog tib tug Ntsuj Plig uas tau qhia tej lus rau cov tub qhe ntawd (saib Q&K 50:19–22). Ib yam li lawv txais Vajtswv txoj kev coj, peb yuav tsum txais thiab. Yog li ntawd peb yuav tsum siv zog ntawm sab ntsuj plig zoo ib yam.

“Ua Nej lub Luag Hauj Lwm”

Ntau xyoo tas los ib tug mej zeej hauv Pawg Kaum Ob tug Thwj Tim thov kom kuv nyeem ib zaj lus uas nws npaj hais nyob hauv lub tuam rooj sab laj. Kuv tau koom pawg no tsis ntev tas los. Kuv zoo siab vim nws ntseeg hais tias kuv pab tau nws nrhiav tej lus uas tus Tswv xav kom nws hais. Tiam sis nws luag nyav hais lus rau kuv hais tias, “Auj, twb tau kho zaj no 22 zaug lawm.”

Kuv nco txog tej lus qhia uas Thawj Tswj Hwm Harold B. Lee (1899–1973) uas muaj siab hlub thiab siab dawb tau sib zog qhia rau kuv dhau los: “Hal, yog koj xav txais kev tshwm sim, ua koj lub luag hauj lwm.”

Kuv tau nyeem, xav txog, thiab thov Vajtswv txog zaj uas twb tau kho 22 zaug lawm ntawd. Kuv tau kawm zoo npaum li kuv kawm tau raws li tus Vaj Ntsuj Plig Dawb Huv qhia. Thaum tus mej zeej hauv kuv pawg tau hais

nws zaj lus, kuv twb tau ua kuv lub luag hauj lwm lawm. Xyov tsis paub yog tias kuv tau pab nws, tiam sis kuv paub tias kuv twb hloov siab thaum kuv mloog nws hais zaj. Kuv tau txais tej lus qhia uas tsis yog cov lus uas kuv tau nyeem thiab cov lus uas nws tau hais xwb. Tej lus ntawd muaj nqi tshaj tej lus uas kuv tau nyeem hauv zaj uas nws tseem kho. Thiab zoo li tej lus qhia ntawd yog hais rau kuv xwb, hais txog tej yam uas kuv xav tau.

Vajtswv cov tub qhe yoo mov thiab thov Vajtswv kom txais tej lus qhia Nws xav muab rau lawv kom hais rau cov uas xav tau kev tshwm sim thiab kev tshoov siab. Qhov uas kuv tau kawm los ntawm qhov no, thiab lwm lub sij hawm zoo li no, yog qhov uas yog peb xav txais kev pab uas los ntawm kev mloog cov yaj saub thiab cov thwj tim tej lus qhia, ces peb yuav tsum them tus nqi peb tus kheej kom txais tau kev tshwm sim.

Tus Tswv hlub txhua tus neeg uas mloog Nws tej lus qhia, thiab Nws paub txhua tus lub siab thiab paub txhua tus raug xwm txheej dab tsi. Nws paub tias txoj kev kho, txoj kev yaum, thiab qhov tseeb ntawm txoj moo zoo twg yuav pab txhua tus neeg zoo tshaj plaws kom xaiv nws txoj kev taug mus rau txoj sia nyob mus ib txhis.

Tej lub sij hawm tom qab lub tuam rooj sab laj peb cov uas mloog thiab saib xav tias, “Qhov uas kuv nco ntsoov yog dab tsi?” Tus Tswv cia siab tias peb txhua tus yuav teb li no hais tias: “Kuv yeej yuav nco ntsoov tej lub sij hawm thaum kuv hnov tus Ntsuj Plig lub suab nyob hauv kuv lub siab lub ntsws uas qhia kuv tias kuv yuav tsum ua li cas kom ua rau kuv Leej Txiv Saum Ntuj Ceeb Tsheej thiab tus Cawm Seej zoo siab.”

Peb yuav txais kev tshwm sim rau peb tus kheej li ntawd thaum peb mloog cov yaj saub thiab cov thwj tim thiab thaum peb rau siab ntseeg kom txais tau, ib yam li Thawj Tswj Hwm Lee hais tias peb yuav tsum ua. Kuv paub qhov no muaj tseeb los ntawm kuv lub neej thiab tus Ntsuj Plig txoj kev ua tim khawv rau kuv.

QHIA LOS NTAWM TSAB XOY NO

Cia li xav seb puas tsim nyog hais lus nrov nyeem Thawj Tswj Hwm Eyring zaj lus txog nws txoj kev nyeem tus thwj tim zaj lus hais nyob hauv lub rooj sab laj. Tej

zaum koj yuav xav nug seb “Tus nqi yus yuav tsum them kom txais tau kev tshwm sim yog dab tsi?” Tom qab nej sib tham, tej zaum koj caw tau cov uas koj mus xyuas kom lawv xav thiab ua raws li ib lub tswv yim kom txais tej zaj lus hais nyob hauv lub tuam rooj sab laj tom ntej “raws li tus Ntsuj Plig qhia uas yog tib tug Ntsuj Plig uas tau qhia tej lus rau [Vajtswv] cov tub qhe ntawd.”

COV HLUAS

Leej Txiv Saum Ntuj Ceeb Tsheej Hais Lus rau Kuv Dhau Los ntawm ib zaj Lus Hais Nyob Hauv lub Rooj Sab Laj
Los ntawm Anne Laleska Alves de Souza

Kuv tsis paub tias kuv yuav tsum kawm dab tsi nyob hauv lub tsev kawm ntawv qib siab. Neeg feem coob tsis pom zoo rau tej yam uas kuv xav kawm, kuv thiaj li thov tus Tswv seb Nws puas pom zoo rau qhov uas kuv tau txiav txim siab ua.

Hnub tom qab ntawd, kuv tau txais lus teb thaum kuv nyeem ib zaj lus los ntawm lub tuam rooj sab laj nyob hauv phau *Liahona*. Ua rau kuv xav tias Leej Txiv Saum Ntuj Ceeb Tsheej qhia kuv tias Nws yuav tsis xaiv rau kuv—qhov no yog ib qho uas kuv yuav tsum txiav txim siab rau kuv tus kheej. Kuv paub tias kuv xaiv dab tsi los, kuv yeej yuav tsum khwv ua hauj lwm kom ua tau.

Kuv paub tias Nws teb kuv tej lus thov. Tus Vaj Ntsuj Plig Dawb Huv txoj kev pom zoo tau pab kuv txiav txim siab. Kuv tau kawm hais tias kuv yuav tsum siv zog ua hauj lwm thiab paub tias Leej Txiv Saum Ntuj Ceeb Tsheej yuav pab kuv.

Tus uas sau zaj no nyob hauv Sergipe, Brazil teb.

COV ME NYUAM

Coj Raws Li tus Yaj Saub Hais

Cov yaj saub thiab cov thwj tim hais lus rau Leej Txiv Saum Ntuj Ceeb Tsheej thiab Yexus Khetos. Lawv qhia peb kom paub coj raws li Yexus. Tej yam uas cov yaj saub thiab cov thwj tim tau hais kom peb ua yog dab tsi?



**Kev Ntseeg,
Tsev Neeg, Kev Pab**

Leej Txiv Saum Ntuj Ceeb Tsheej cov Ntxhais

Ua tib zoo thov Vajtswv kawm tej yam no thiab nug seb koj yuav tsum qhia dab tsi. Qhov uas koj to taub “Tsev Neeg: Ib zaj Lus Tshaj Taum rau lub Ntiaj Teb” yuav ua li cas kom koj txoj kev ntseeg Vajtswv loj zuj zus thiab foom koob hmoov rau cov uas koj mus saib xyuas tom tsev? Kom tau ntaub ntauv xov xum ntxiv, cia li txuas rau reliefsociety.lds.org.

Cov vaj lug kub qhia peb tias “peb yog Vajtswv cov me nyuam” (Tes Hauj Lwm 17:29). Vajtswv hais tias Emma Smith, tus Yaj Saub Yauxej Xamiv tus poj niam, yog Nws tus ntxhais (Q&K 25:1). Zaj lus tshaj tawm txog tsev neeg qhia peb tias peb txhua tus yog “ib tug . . . ntxhais ntsuj plig ntawm ib khub niam txiv saum ntuj ceeb tsheej.”¹

Carole M. Stephens, tus pab cuam thib ib hauv Koom Haum Niam Tsev pawg tuam thawj tswj hwm, hais tias “Nyob saum ntuj, peb tau kawm txog qhov uas peb yog poj niam mus ib txhis li.

Peb txoj kev ua neej hauv lub ntiaj teb no tsis tau hloov tej qhov tseeb ntawd.”²

Txwj Laug Jeffrey R. Holland ntawm Pawg Kaum Ob tug Thwj Tim hais tias, “Nej Leej Txiv Saum Ntuj Ceeb Tsheej paub nej tej npe thiab paub nej raug xwm txheej dab tsi. Nws hnov nej tej lus thov. Nws paub nej tej kev cia siab thiab nej tej kev ua npau suav, tsis hais nej tej kev ntshai thiab tej kev poob siab los yog.”³

Muam Stephens hais tias, “Peb txhua tus koom nrog Vajtswv tsev neeg thiab Vajtswv xav tau peb. Tej tsev neeg hauv lub ntiaj teb nyias txawm nyias. Thiab txawm peb ua zoo

npaum li peb ua tau kom muaj tsev neeg zoo li ib txwm muaj, qhov uas peb yog Vajtswv tsev neeg tsis nyob ntawm seb peb yog neeg zoo li cas—tsis hais peb yuav leej twg, peb puas yog niam tsev, peb muaj nyiaj npaum li cas, peb puas muaj npe, los sis peb sau dab tsi rau Internet.”⁴

Vaj Lug Kub Ntxiv

Yelemis 1:5; Loos 8:16; Lus Qhuab Qhia thiab Kev Khi Lus 76:23–24

Los ntawm Peb zaj Keeb Kwm

Thaum nws sau ntawv txog Thawj Zaj Ua Yog Toog Pom,⁵ tus Yaj Saub Yauxej Xamiv qhia ntau yam qhov tseeb—xws li qhov uas Leej Txiv Saum Ntuj Ceeb Tsheej paub peb tej npe.

Yauxej tsis tau paub tias nws yuav tsum koom lub koom txoos twg thiab nws nrhiav tau tej lus coj kev nyob hauv phau Yakaunpaus tshooj 1: Yauxej txiav txim siab tias nws yuav nug Vajtswv.

Muaj ib hnuv sawv ntxov thaum lub caij nplooj ntoo hlav xyoo 1820, nws mus rau hauv koog ntoo thov Vajtswv tiam sis muaj ib lub hwj chim tsaus ntuj uas tsim txom nws. Nws sau txog lub sij hawm no hais tias:

“Thaum muaj kev nyuaj siab no, kuv txawm pom ib qho kaj nyob kiag

saum kuv taub hau, ci ntsa iab tshaj lub hnuv, qhov kaj nqi zuj zus txog thaum nws nyob ntawm kuv.

“Qhov kaj ntawd nyuam qhuav tawm los xwb ces kuv txawm pom tias kuv raug dim ntawm tus yeeb ncuab uas tau ntes kuv ntawd. Thaum qhov kaj txog ntawm kuv, kuv tau pom ob tug Neeg, uas ci ntsa iab thiab muaj yeeb koob uas kuv tsis paub piav txog, nkawd nyob saum ib nta ntuj. Ib tug hais lus rau kuv, tuav kuv lub npe thiab taw tes rau tus ntawd, ces tau hais tias—*Nov yog Kuv tus Tub uas Kuv Hlub. Cia li mloog Nws lus!*” (Yauxej Xamiv-Keeb Kwm 1:16–17).

LUS CIM

1. “Tsev Neeg: Ib zaj Lus Tshaj Tawm rau lub Ntiaj Teb,” *Liahona*, Kaum Ib Hlis Ntuj 2010, 129.
2. Carole M. Stephens, “Peb Tsev Neeg Los ntawm Vajtswv Los,” *Liahona*, Tsib Hlis Ntuj 2015, 11.
3. Jeffrey R. Holland, “To Young Women,” *Liahona*, Kaum Ib Hlis Ntuj 2005, 28.
4. Carole M. Stephens, “Peb Tsev Neeg Los ntawm Vajtswv Los,” 11.
5. Saib Gospel Topics, “First Vision Accounts,” topics.lds.org.

Xav Txog Qhov No

Qhov uas koj paub tias koj yog Vajtswv ib tug ntxhais ua li cas rau koj txoj kev txiav txim siab?